

Na osnovu člana 59. stav 5. i člana 117. stav 5. Zakona o zaštiti okoliša («Službene novine Federacije BiH», broj 33/03) federalni ministar prostornog uređenja i okoliša donosi

PRAVILNIK
O UVJETIMA I KRITERIJIMA KOJE MORAJU ISPUNJAVATI NOSIOCI IZRADE
STUDIJE UTICAJA NA OKOLIŠ I VISINI NAKNADE I OSTALIH TROŠKOVA NASTALIH
U POSTUPKU PROCJENE UTICAJA NA OKOLIŠ

I OPĆE ODREDBE

Član 1.

Ovim pravilnikom se propisuju uvjeti i kriteriji koje moraju ispunjavati pravne osobe za obavljanje poslova na izradi Studije utjecaja na okoliš (u daljem tekstu: Studija), utvrđuje naknada za ocjenu Studije i ostali troškovi koje mogu imati nadležni organi i drugi učesnici u postupku procjene utjecaja na okoliš.

II UVJETI KOJE MORAJU ISPUNJAVATI NOSIOCI IZRADE STUDIJE

Član 2.

Nosilac izrade Studije može biti pravna osoba registrirana za obavljanje djelatnosti «Istraživanje i razvoj» pod šifrom 73. 1 u skladu sa Odlukom o standardnoj klasifikaciji djelatnosti u Federaciji Bosne i Hercegovine («Službene novine Federacije BiH», broj 28/98) i uz ispunjavanje ostalih uvjeta propisanih ovim Pravilnikom .

Član 3.

Osim uvjeta iz člana 2. ovog pravilnika da bi mogla obavljati poslove izrade Studije pravna osoba mora imati najmanje pet zaposlenika visoke stručne spreme sa najmanje pet godina iskustva iz oblasti istraživanja i razvoja.

Član 4.

Pravna osoba koja ispunjava uvjete iz čl. 2 i 3. ovog pravilnika dostavlja Federalnom ministarstvu prostornog uređenja i okoliša (u daljem tekstu: federalno ministarstvo) sljedeće:

- 1) reference o izradi Studija ili Elaborata o zaštiti okoliša;
- 2) certifikate o obuci iz oblasti procjene utjecaja na okoliš;
- 3) reference i/ili certifikate o obuci iz oblasti okolišne dijagnostike industrijskih pogona i postrojenja, sistema okolišnog upravljanja EMS i sistema kvaliteta iz serije ISO 14000,
- 4) objavljene stručne radove iz oblasti procjene utjecaja na okoliš.

Član 5.

Pravne osobe iz člana 2. ovog pravilnika mogu formirati konzorcije sa drugim pravnim osobama sa liste za obavljanje poslova na izradi Studije.

Pravne osobe iz člana 2. ovog pravilnika mogu angažirati neovisne eksperte raznih struka, koji ispunjavaju uvjete iz člana 3. ovog pravilnika, za obavljanje poslova na izradi Studije.

III ZAHTJEV ZA STAVLJANJE NA LISTU

Član 6.

Pravna osoba iz člana 2. ovog pravilnika podnosi zahtjev za stavljanje na listu nosioca izrade studije federalnom ministarstvu.

Uz zahtjev iz stava 1. ovog člana prilaže se sljedeće:

- 1) Izvod iz sudskog registra sa svim priložima;
- 2) Popis zaposlenika sa dokazom o njihovoj stručnoj spremi, dokazom o radnom iskustvu, podacima o nazivu i adresi pravnih osoba kod kojih su bili zaposleni,
- 3) Ostale dokaze u skladu sa članom 4. ovog pravilnika.

Član 7.

Na temelju dostavljenih zahtjeva federalno ministarstvo utvrđuje listu nosioca izrade Studije.

Lista nosioca izrade Studije sa podacima iz stava 1. ovog člana objavljuje se na web stranici federalnog ministarstva.

IV BRISANJE SA LISTE NOSIOCA IZRADE STUDIJE

Član 8.

Pravno lice koje se nalaze na listi nosioca izrade Studije dužno je da obavjesti federalno ministarstvo o svim promjenama u pogledu ispunjavanja uvjeta propisanih ovim pravilnikom u roku od 15 dana od dana nastanka promjene.

Federalno ministarstvo briše sa liste pravno lice koje ne ispunjava uvjete propisane ovim pravilnikom.

Obavještenje o brisanju pravnog lica sa liste nosioca izrade Studije objavljuje se na web stranici federalnog ministarstva.

V NAKNADE I OSTALI TROŠKOVI

Član 9.

Rješenjem federalnog ministra utvrđuje se iznos naknade za postupke procjene uticaja na okoliš i izdavanja okolinske dozvole.

Naknada iz stava 1.ovog člana obuhvata nadoknadu za rad stručnjaka iz federalnog ministarstva i ostale troškove postupka..

Naknada za rad stručnjaka federalnog ministarstva obuhvata troškove prevoza, dnevnica i smještaja.

Troškovi postupka obuhvataju kopiranje i distribuciju dokumentacije za procjenu uticaja na okoliš i okolinsku dozvolu, troškove iznajmljivanja sale za održavanje javnih rasprava, troškovi obavješćavanja javnosti: oglasi, brošure, plakati...

Naknada za rad vanjskih stručnjaka u slučaju potrebe njihovog angažiranja iznosi 15% prosječne mjesečne neto plaće po zaposlenom ostvarene na nivou Federacije Bosne i Hercegovine za posljednje tromjesječje za jedan norma dan rada na ocjeni studije po pojedincu.

Broj norma dana i iznos naknade iz stava 5.ovog člana utvrđuje se rješenjem federalnog ministra prema složenosti postupka.

Član 10.

Podnosilac zahtjeva je dužan uplatiti ukupan iznos naknade iz člana 9.ovog pravilnika u roku od 7 dana od dana prijema rješenja o odobravanju ili odbijanju studije, odnosno okolinske dozvole.

Izuzetno od odredbe stava 1. ovog člana podnosilac zahtjeva može izmiriti sve ili dio troškova postupka iz stava 4.člana 9.ovog pravilnika direktnom uplatom trećim licima.

Za iznos izmirenih troškova iz stava 2.ovog člana naknada će se umanjiti.

VI PRELAZNE I ZAVRŠNE ODREDBE

Član 11.

Odredbe ovog Pravilnika primjenjuju se i za nosioce izrade Studije za zrak u skladu sa Zakonom o zaštiti zraka («Službene novine Federacije BiH», br. 33/03).

Član 12.

Ovaj pravilnik stupa na snagu osmoga dana od dana objave u "Službenim novinama Federacije BiH".

FEDERALNI MINISTAR

Ramiz Mehmedagić

("Službene novine Federacije BiH", broj 19/04)